

**Ka Jingpule
Shaphang
Ka Ktien**

M. B. JYRWA

Ka Jingpule Shaphang

Ka Ktien

Ban Pynsah Jingkynmaw
Ia I Mei (Blessimai Nongrum)
Bad
Ia I Papa (Howell Davies Khongwir)
Kiba Long
Ki Nonghikai Ba Nyngkong
Jong Nga

Second and Revised Edition - 2009
5000 copies
Published by
The Author
(Ia ka hok tynrai la tyngkai)

KA LAMPHANG

	KA LAMPHANG	i
1.	KA LINGUISTICS	1
2.	KA PHONETICS BAD KA PHONOLOGY	29
3.	KA MORPHOLOGY	46
4.	KA TENSE	54
5.	KA ASPECT	74
6.	KA JINGIAKHLEH KI ASPECT MARKER BAD KI MODALITY MARKER	93
7.	KI KYNTIEN KYLLI	101
8.	KA SHYNRONG JONG KA VERB	116
	KI KOT BA LA PYNDONKAM	124

Ka Lamphang

Kane ka kot kaba lyngkot eh halor katto katne ki jingshisha ba ia dei bad ka jingpule ia ka ktien ka la mih nyngkong ha ka snem 1995. Ka daw jong ka jingmih jong ka ka la long ka Refresher - cum - Orientation Course in Khasi Language Teaching na ka bynta ki nonghikai ha College. Ka la don ka jingpyrkhat hapdeng ki nonghikai ba dei ban thoh bad kren ei ei halor ka phang Ka Jinghikai Linuistics. Ha ka sien shon kaba nyngkong nga la pyrshang ban spel Khasi ia kiba bun ki kyntien kiba na ka English, hynrei ha kane ka kynti nga la pyntylla lut ia kata baroh na ka daw jong ka jingsngew dkhoh kaba jur ban ong lingkwistik haba baroh ki nongpule kim kynnoh satia kumta. Sa kawei pat ka daw jong ka jingpyntylla ka long ba kane kaba spel Khasi ka thap lam sha kaba ki nongpule kin spel bakla ia kito ki kyntien ynda haba ki dei ban thoh shaphang jong ki ha ka English.

Ha kane ka sien shon la pyndap sa ar tylli ki lynnong, bad kita ki long: kawei halor ki kyntien kylli bad kawei pat halor ka Verb Khasi. Ka kot hi ka long ka jingpyrshang kaba rit eh na ka liang jong nga hynrei nga kyrmen ba kan ai jingtip bad jingmyntoi ia ki nongpule. Ka jingpule shaphang ka ktien ka long ka lyngkha kaba iar bad ngan sngewkmen shibun eh lada kin mih nangne sha khmat ki nongpule ki ban tynrong ha lade ia ka jingkit ban nang thoh shuh shuh sa kiwei pat ki thup kiba ia dei bad ka linguistics bad kyrpang eh halor ka ktien Khasi, ka ktien kaba ngi ieit eh.

Ha - Sharing
Lumbhalang
Nongthymmai
Shillong - 7983014

M.B. Jyrwa

Lynnong 8

KA SHYNRONG JONG KA VERB

Ka shynrong jong ka Verb ha ka ktien Khasi ka long ka bynta ba nga kwah ia ngi ban ia peit lang mynta. Ki la don katto katne ki jingpule halor kane, hynrei kita kim pat long kaba kut jong ka jingpule. Ka Lily Rabel (1961) ka la peit bniah ia ka ktien Khasi bad ka ong ba ka shynrong jong ka Verb ka don lai bynta kumne:

- (i) ki kyntien na khmat ka Verb kum kito ia kiba la kdew ha kiwei pat ki lynnong kum ki aspect, modal, tense, negative marker;
- (ii) ki kyntien kiba dei ki Verb;
- (iii) ki kyntien kiba bud nadien ka Verb kiba lah ban long ki adverb kiba ki briew kiba kren Khasi ki nang bha ban pynwan kat kum ka jingsngew ne jingiohi jong ki ia kata kaei kaei kaba ki batai kum ldui, ldai, ldet, ldit, etc.

Ha kine ki sentens harum ki bynta kiba la buh ha ki dak iöng ki dei ka thup kyntien ba la kdew haneng kum ka Verb kaba don ia ki lyngkhot kyntien kiba na shuwa bad nadien ka Verb pdeng. Kumba la kdew da ki kyntien kramar ba la buh hapoh braket, ngi lah ban ong ba ka jingkynthoh shaphang ka Verb Khasi ka long kaba dei.

1.	U	La	lah	leit	Shatei
	(Pron.	Tense	Aspect	V	Adverb

Ka Shynrong jong ka Verb

2.	U	lah	da	leit	Shatei		
	(Pron.	Aspect	M	V	A		
3.	U	La	lah	rung	Kluk	sha	iing
	(Pron.	Tense	Aspect	V	Adverb	Prep.	N
4.	U	lah	thied	iing			
	(Pron.	Aspect	V	N			
5.	U	leit	rwing				
	(Pron.	V	Adverb				

Ka jingkynthoh halor kitei ki sentens ka long tang na ka liang ka Verb. Ym shym kren ei ei shaphang ka bynta kaba ka kyntien U kaba dei ka subjek jong ka sentens ka shim. Ha ka sentens (1) ka Verb ka kyntien ia ka tense, ka aspect, bud sa ka Verb, nangta sa bud sa ka adverb. Ka sentens (2) ka don ka Verb kaba kyntien ia ka aspect, ka **da_m** bud sa Verb, nangta sa ka adverb. Ka sentens (3) ka kyntien ia ka tense, ka aspect, ka Verb bad ka adverb. Hadien jong kine ki bynta ba pher jong ka Verb ngi iohi ba kiwei pat ki kyntien kiba bud ki long ka preposition bad ka noun. Ka sentens (4) pat ka don ka Verb kaba la pynlong tang da ka aspect bad ka Verb hi. Hadien jong ka ngi iohi ka kyntien kaba bud ka dei ka noun. Ka sentens (5) ka don beit tang ka Verb ia kaba la bud tang da ka adverb. Ha kane ka jingthoh ba lyngkot ka jingpyrshang ban peit ka long beit tang ia ka Verb na ka liang ki kyntien kiba pynlong ia ka thup kaba tang haduh ha ka Verb hi. Ngan ym kren ia kito ki kyntien kiba bud ia ka Verb lane don nadien ka Verb kiba dei hi ki adverb.

Ka Verb: Ka Sawa Kumjuh Kum Ka Noun

Don bun ki Verb ha ka Khasi kiba sawa kumjuh kum kiwei pat ki kyntien kiba dei ki Noun. e.g.

khlaw (V) kum ha ka sentens: *Ki khlaw ia ki khmat jong u.*

khlaw (N) *U sah sha khlaw.*

khlur (V) *U khlur ummat ha kata ka por.*

khlur (N) *Ki khlur ki tyngshaiñ ha sahit bneng.*

ieit (V) *U Blei u ieit ia phi.*

ieit (N) *I ieit i la wan ieuw.*

Ki kyntien **khlaw** bad **khlur** haba ki dei ki noun ki lah ban shah mait noh khyndiat na khmat haba ki dei ban iasnoh bad kano kano kawei pat ka kyntien ban pynlong compound noun e.g., **lawkyntang**, bad **lurstep**. Hynrei kine kijuh ki kyntien haba ki dei ki Verb kim shah satia ba yn mait ia ki. Kane ka long kawei ka dong na kaba ngi lah ban peit bad rai la ka kyntien ka dei ka Verb ne em.

Ka Verb: Kaba long tang kawei ka kyntien

Kawei pat ka jinglong jong ki Verb Khasi ka long ba ki long shishikyntien. e.g., **pdiang**, **khoh**, **thoh**, **shad**, **khang**, **rkhie**, **thied**, **wiat rwat**, **tbeh**, **shet**, etc

Ka Verb: Ka shynrong kaba long V+N

Ki kyntien (verb) kiba long ki Transitive Verb ym dei tang ba ki dawa ba dei ban don ka noun ka ban bud ia ki hynrei ba haba ka noun ka bud, kata ka jingbud ka wanrah ka jingmut ha ka sentens ka bym dei shuh tang kat kum ka Verb hynrei ka jingmut ka mih na ka jingiakhñiot lang jong baroh ar kita ki kyntien Verb bad noun. e.g. **bam soh**. Haba ong **bam soh** ka jingkdew ka long ia kawei ka kam kaba long **bam soh**. Lada transleit ia kane sha

ka English ka kam kaba ka kynhun kyntien ka kdew ka long **fruit eating**. Kane ka long kyrpang eh haba ka kyntien kaba dei ka noun ka don marbud ia ka verb. Lada hapdeng **bam** bad **soh** don noh ka preposition ia bad ka noun marker **u** kum haba ong **bam ia u soh** ka jingmut ka pher khyndiat. Ngam artatien ei ei ba baroh kiba kren Khasi ki sngewthuh ia ka jingiapher kaba don hapdeng ka **bam soh** bad **bam ia u soh**. Ka **bam ia u soh** ka long kaba lah ban transleit kum **eating a/the fruit**. Ha ka jingsngew jong nga, nga sngew kumba ka **bam soh** ka thew ia ka kam, kata ia kaei kaba uta u briew u leh, katba ka **bam ia u soh** pat ka thew ia ka kam ba la leh ia u soh. Kane ka long ka jingpyniapher kaba ni, kaba ngi lah ban ong ka shat rong jong ki kyntien haba la pyndonkam ia ki ha ki rukom kiba pher.

Lada ngi pdiang ia kane ka shat rong ngi lah ban ong ba ka Verb ha ka Khasi kam long tang kat kumba la kdew da ka Lily Rabel hynrei ba ka shynrong jong ka Verb Khasi ka lah ruh ban long Verb + Noun. Don bun ki nuksa kiba don ia kane ka shynrong. e.g. **thlieh dieng**, **siah phan**, **khoh kwai**, **brut juti**, **sait jaiñ**, **ai um**, **ai ja**, **kheit soh**, etc.

Ka Verb: Ka shynrong kaba long V+N+N

Nalor kitei, don sa kiwei pat ki Verb kiba la pynlong da ka jingiasnoh lang jong sa ar tylli kiwei pat ki kyntien kiba dei hi ki noun kumne harum.

aiphlangmasi, aiumjhur, aisbohdawai, aijaksew

Kine saw tylli ki Verb ki long kiba lah ban phiah kumne:

Ka Shynrong jong ka Verb

ai phlang masi

V + N + N

ai um jhur

V + N + N

ai sboh dawai

V + N + N

ai ja ksew.

V + N + N

Lada ha katei ka shynrong ngi bsuh noh da ka preposition ia bad ka noun marker kaba biang ngi ioh ia kine ki sentens harum

Ai phlang ia ka masi

Ai um ia u jhur

Ai ja ia u ksew.

(Ngim ju lah ban ong *Ai sboh ia ka dawai).

Ka shat rong kaba ngi iohi ha kane ka jingiapher **aiphlangmasi** etc., bad **ai phlang ia ka masi** etc., ka long kum haba ka shynrong jong ka Verb ka long V+N ha ki nuksa **bam soh** etc bad **bam ia u soh** haneng.

Ka Verb: Ka shynrong kaba long Aspect/Modal + V

Ka Verb Khasi ka lah ban long kaba la pynlong da ka jingiasnoh lang jong ki aspect ryngkat bad ki modal marker. Ha ka lynnong ba dei ia ka Mood bad ka Aspect la dep pyni shibun ki sentens kiba pynpaw shai ba ka Verb borabor ka kynthup ia kine ki kyntien kiba pher

kiba **nama ba** ki ieng borabor ha khmat ka Verb la khot ia ki ki **Pre Verbal Particle**.Ki kyntien kiba don ha shuwa ka Verb bad kiba pynlong ka thup Verb ki long **pyn, ia, iai, dem, ju, shait, da, la, yn, lah, lah, dang, nang, sa**. Lehse ym donkam ban dang kren ei ei shuh shaphang kine.

Ka Verb: Ka shynrong kaba long V+V

Kawei ka jinglong kyrpang jong ka **shynrong** Verb ha ka ktien jong ngi ka long ba ar tylli ki Verb kiba paka ki lah ban ia don lang hajuh. Ha kivei pat ki kyntien lah ban ong ba ka Verb ka lah ban long kaba la pynlong da ar tylli ki Verb kiba paka. (Ka kyntien paka hangne ka thew ia kaba ki kyntien kim dei ki Verb kiba mih na ka jingiasnoh lang jong ki kyntien). Ki nuksa jong kum kane ka shynrong Verb ki long:

- | | |
|------|-------|
| | on |
| | peit |
| leit | shoh |
| | thied |
| | shaw |
| | shong |
| | trei |
| wan | bylla |
| | ai |
| | kylli |
| | jngoh |

Ka Verb: Ka shynrong kaba long V+ban+V

Haba peit bniah ia kine ki Verb kiba don lang ar ar ngi lah ban ong ba kine ki Verb kiba bud ia ka kyntien **leit** bad **wan** ki long ma ki kiba ai ia ka jingthmu jong ka

jingleit lane jingwan. Ka jingiadon lang jong ki Verb ha ka rukom kumba la kdew ka pynpaw ia ar tylli ki kam ba la peit kum kawei. Lah ban pynshisha ba ki kam ki long ar, da kaba bsuh ia ka kyntien **ban** hapdeng kumne: **leit ban shaw, wan ban jngoh** bad kane ka kyntien **ban** ynda haba ka bsuh kumba la kdew ka nang pynpaw shuh shuh ia ka jingthmu jong kata ka jingleit ne jingwan. Kumta lah ruh ban ong ba sa kawei pat ka shynrong Verb ka long V + ban + V. Don bun ki briew kiba phiah ia ka V + ban + V sha ka shynrong V + ia ka ban + V kumne: **leit ban shaw** phiah sha **leit ia ka ban shaw**.

Ki Verb kiba ia dei bad ka bor jong ki khmat., khmut, shkor, kti, thylleij ki long **i, sma, sngew, ktah** bad **mad**. Kine ki Verb ki ju ia iaid lang ruh bad kiwei kiwei pat ki Verb ban pynlong ki Verb kiba ka shynrong jong ki ka long V+V kum kito ba la kdew haneng. Hangne ka long kaba donkam ban kdew ba ki Verb **i** bad **sngew** kiba iaid ryngkat ryngkat bad ka Verb ioh kumta ba ngi ioh **iohi** bad **iohsngew**. Bunsien ngi sngew la kumba **iohi** ka dei kawei ka kyntien bad **iohsngew** pat sa kawei bad namarkata kine ki long tang ar tylli hi ki verb. Ka dustur thoh lang ia kine ki Verb ka nang iarap ban pynskhem ia kane ka jingsngew. Hynrei ynda ngi peit pat ia ki na ka liang ba kine ki hi ki Verb ki lah ban shah ba yn lam khmat ia ki da kiwei pat ki aspect marker kum **pyn-** kumta ba ngi ioh ia ki kyntien **pyni, pynsngew** ka pynpaw shai ba kine ki Verb **iohi** bad **iohsngew** ki don ia ka shynrong kaba long V+V. Lada ngi shah ba yn lam khmat ia ki sa da kiwei pat ki Verb ba laitluid kum **kwah** kum haba ong **kwah iohi, kwah iohsngew**, ngi lah ban ioh sa ka shynrong Verb kaba long V+V+V.

Ka Verb: Ka shynrong kaba long V+shi+V bad V+sam+V

Ka Verb ha ka Khasi ka dang don shuh shuh sa kiwei pat ki shynrong kiba long V+shi+V bad V+sam+V kum ha kine ki nuksa harum.

*ktah shi ktah,
ong shi ong,
kwah sam thied
kwah sam ong*

Ka jingdon jong ka kyntien **shi** ka kdew ia kaba ia ka kam jong ka Verb la leh bunsien katba ka kyntien **sam** pat ka kdew ba ka don ka jingbabe ia kata kaba ka Verb kaba nadien ka kdew. Lada shim ia ka **sam** ha kitei ki nuksa haneng ka jingbabe ka long ia kata kaba la **thied** bad ba la **ong**. Ka kyntien **sam** ka ju iaid ha shuwa ki Verb kum **thiah, ong, bam,** etc., bad ka jingmut jong ka hi ka long ba ka don ka kynjia jingkwah hynrei lait noh na ka **samthiah** bad **samshabar** ka jingmut jong ka ka kham lam sha kaba don ruh bad ka jingbabe.

Ha kaba kut bad na kaba la kdew, ngi lah ban ong ba ka shynrong jong ka Verb Khasi kam long tang kawei hynrei ka kynthup ia shibun kumba ki nuksa na ka ktien hi ki kdew. Kine ki long tang khyndiat eh ki jingkdew halor ka shynrong jong ka Verb ha ka Khasi.



